



法苑珠林卷第五十二

唐上都西明寺沙門釋道世玄暉撰

伽藍篇第三十六

述意部

原夫伽藍者、管布金西域、肇樹福基、締構東川、終祈淨業、所以寶塔蘊其炎明、精舍圖其形像、徧滿三千之界、住持一萬之年、建苦海之舟航、爲信根之枝幹、覩則發心、見便忘返、益福生善、稱爲伽藍也、但惟年代日遠、法教衰替、寺像雖立、敬福罕儔、或真或僞、改換隨情、或精或麤、乃同蕃土、遂令目覩其迹、莫識厥

旨日用其事不知所由是以行道之衆心無所安流俗之徒於法無敬輕慢於是乎生陵蹈於是乎起欲以此護法不亦難哉者乎是以古德寺誥乃有多名或名道場卽無生廷也或名爲寺卽公廷也或名淨住舍或名法同舍或名出世間舍或名精舍或名清淨無極園或名金剛淨刹或名寂滅道場或名遠離惡處或名親近善處並隨義立各有所表今道俗禱居豈得稱名也

營造部

依宣律師祇洹寺感通記云經律大明祇洹寺之基趾多云八十頃地一百二十院准約東西近有十里南北七百餘步祇陀須達二人共造成之已後經二百年被燒都盡則當此土周姬第十三王平王之三十一年祇陀太子初雖不許賣後見布金欣然奉施卽告長者吾自造寺不假於卿須達不許因此共造太子立願後若荒廢願樹還生恰至被燒屋宇頓盡所立樹者如本不殊何以被燒是由須達爲凡之時賣肉得財居賤出貴常願荒儉雖巨富財由穢心故以此造寺終遭煨燼太子願力淨心樹生業行有殊表之染淨也於後五百年有旃育迦王依地而起十

不及一經于百年被賊燒盡經十三年有王六師迦者依前重造屋宇壯麗皆寶莊嚴一百年後惡王壞之爲殺人場四天王及娑竭龍王忿之以大石壓之殺毀者經九十年荒無人物忉利天王令第二子下爲人王又依地造莊飾嚴好過佛在時經百五十年魔天燒滅則當此土漢末獻帝二十九年以事往徵顯宗已後和安桓靈之代西域往來行人踵接則見天王葺構之作祇樹載茂之緣後雖有造者僅接遺基至于今日荒涼而已依南天王子撰祇洹圖一百卷北天王子撰五大精舍圖二百卷各在本天不可具述也。○夫造寺法用不可楷定隨其施主物有豐儉雖量力而作然須用心精誠而造寺物雖小得福弘大故無上依經云雖造四果聖人塔廟滿四天下盡形供養不如有人佛涅槃後取佛舍利造塔供養所得功德勝前功德百千萬億分不可爲喻也。一由有優劣二由心有強弱若有真心縱小尚得福多何況於大若有僞心縱大尚得福少何況於小是故行者若欲造作必須殷重不得輕慢也如賢愚經云天語須達長者云汝往見佛得利無量正使令得百車珍寶不如轉足一步至趣世尊正使令得百象珍寶

不如舉足一步往趣世尊正使令得一四天下滿中
珍寶不如舉足一步至向世尊所得利益盈逾於彼
百千萬倍聞已歡喜佛爲說法成須陀洹果須達問
舍利弗世尊足行日能幾里舍利弗言日半由旬如
轉輪王足行之法世尊亦爾爾時須達長者卽於道
次住二十里作停舍須達請太子欲買園造精舍祇
陀太子言若能以黃金布地令間無空者便當相與
須達曰諾謹隨其價太子祇陀言我戲語耳須達言
太子不應妄語卽共與訟時首陀會天化作一人爲
評詳言夫太子法不應妄語價旣已決不宜中悔太
子遂與之便使人象負金出八十頃中須臾欲滿殘
餘少地禰阿舍經殘五百步字經亦太須達思惟何
藏金足不多不少當取滿之祇陀問言嫌貴置之答
言不也自念金藏何者可足當得補滿祇陀念言佛
必大德乃使斯人輕寶乃爾教齊且止勿更出金園
地屬卿樹木屬我我自上佛共立精舍須達歡喜卽
然可之卽便歸家當施功作六師聞之往白國王長
者須達買祇陀園欲爲瞿曇沙門興立精舍聽我徒
衆與共角術沙門得勝便聽起立若其不如不得起
也瞿曇徒衆住王舍城我等徒衆當住於此王報須

達六師出如此言須達愁惱不樂舍利弗怪問不樂
達具述報之舍利弗言正使六師滿閻浮提數如竹
林不能動吾足上一毛欲角何等自恣聽之須達歡
喜卽報國王却後七日當於城外寬博之處時舍利
弗共勞度差各現神變外道不如具在經文時舍利弗既
見外道受屈卽爲說法隨其本行宿福因緣各得道
迹六師徒衆三億弟子於舍利弗所出家學道角技
訖已各還所止長者須達共舍利弗住圖精舍須達
自手捉繩一頭時舍利弗自捉一頭共經精舍時舍
利弗欣然含笑須達問言尊者何笑答言汝始於此
經地六欲天中宮殿已成卽借道眼悉見六天嚴淨
宮殿問舍利弗言是六天何處最樂舍利弗言下三
色染上二憍逸第四天中少欲知足恒有一生補處
菩薩來生其中法訓不絕須達言曰我正當生第四
天中出言已竟餘宮悉滅唯第四天宮殿湛然復更
徙繩時舍利弗慘然憂色卽問尊者何故憂色答言
汝今見此地中蟻子不耶對曰已見時舍利弗語須
達言汝於過去毗婆尸佛亦於此地爲彼世尊起立
精舍而此蟻子在此中生乃至七佛已來汝皆爲佛
起立精舍而此蟻子亦在中生至今九十一劫受一

種身不得解脫生死長遠唯福爲要不可不種是時須達悲心憐傷經地已竟起立精舍爲佛作窟以妙梅檀用爲香泥別房住止千二百處凡百二十處別打捷椎施設已竟欲往請佛卽往白王王聞卽遣請佛世尊與諸四衆前後圍遶放大光明震動天地徧照三千城中伎樂不鼓自鳴盲聾病者皆得具足男女大小覩斯瑞應歡喜踊躍來詣佛所十八億人都悉來集聚爾時世尊隨病投藥爲說妙法各得道迹佛告阿難今此園地須達所買林樹華果祇陀所有二人同心共立精舍應當與號太子祇陀樹給孤獨食園名字流布傳示後世爾時阿難及四部衆聞佛所說頂戴奉行又涅槃經云須達取金隨集布地一日之中唯五百步金未周徧祇陀卽語須達餘未徧者不復須金請以見與我自爲佛造立門樓常使如來經由入出祇陀長者自造門樓須達長者七日之中成立大房足三百口禪坊靜處六十三所冬室夏堂各各別異厨坊浴室洗腳之處大小園厠無不備足○問曰何故如來偏住此園耶答曰依真諦師傳云過去第四拘留孫佛時人壽四萬歲有長者名曰毗沙此地廣一由旬純以金板布地徧滿其上奉施

如來以爲住處第五拘那含牟尼佛時人壽三萬歲
有長者名大家主以此園地廣三十里純以銀衣等
徧布其地并以乳牛及犢子充滿其中奉施如來起
爲住處第六迦葉波佛時人壽二萬歲有長者名大
旃相以此園地廣二十里純以七寶徧布其地奉施
如來起爲住處第七今釋迦牟尼佛人壽百歲時有
長者名須達於此園地廣唯十里純以金餅布地周
滿園中金厚五寸買此園地奉施如來起爲住處至
後彌勒佛出世時人壽八萬歲須達爾時爲蟻佉國
大臣名須達多此園地還廣一由旬純以七寶徧滿

布地奉施如來起爲住處過去未來地雖延促終是
一所能施之人雖有前後據體而論還是一人恒爲
長者殷富熾盛常充供養諸佛不絕至釋迦時初得
須陀洹果臨終時得阿那含果至彌勒佛出時方證
阿羅漢果故禱阿含經云給孤獨長者疾病佛自往
看病記其得阿那含果乃至命終生兜率陀天恒下
來禮拜佛聽法已還歸天上此據迹中亦其小又大
說論實是大菩薩又大
集經云佛告梵天王等我諸聲聞現在未來三業相
應及與三種子菩提相應有學無學具足持戒多聞善
行度諸衆生於三有海及諸施主爲我聲聞而造塔

寺亦復供給一切所須及彼眷屬付囑汝等勿令惡生非法惱亂爾時梵釋天王龍王夜叉等合掌向佛而作是言大德婆伽婆已有一切如來塔寺及阿蘭處及未來世若在家出家人爲於世尊聲聞弟子造塔寺處我等悉共守護令離一切諸難怖畏亦如有給施飲食衣服臥具湯藥一切所須如是施主我等亦當護持養育故七佛經云護僧伽藍神斯有十八神一名美音二名梵音三名天鼓四名歎妙五名歎美六名摩妙七名雷音八名師子九名妙歎十名梵音十一名人音十二名佛奴十三名歎德十四名廣目十五名妙眼十六名徹聽十七名徹視十八名徧視寺既有神護居住之者亦宜自勵不得惰怠恐招現報也

致敬部

述曰依如西域凡有士女既到伽藍至寺門外慶已所遇先整衣服總設一禮入寺門已復設一拜然後安詳直進不得左右顧盼也故涅槃經云往僧坊者有其七法一者生信二者禮拜三者聽法四者至心五者思義六者如說修行七者迴向大乘利安多人住是七善最勝最上不可譬喻又郁迦長者經佛言

長者居家菩薩入佛寺精舍當住門外五體作禮然後當入精舍自念言我何時當得如是居寺出塵垢之處又十住毗婆沙論云在家菩薩若入佛寺初欲入時於寺門外五體投地應作是念此是善人住處行慈悲喜捨住處是故須禮若見諸比丘威儀具已恭肅敬心禮拜親近問訊也又自愛經云時有國王詣佛所遙見精舍下車卻蓋解劍脫履拱手直進又僧祇律云若行平視迴時合身總迴行時先下腳跟後下腳指又智度論云先入來去安詳一心舉足下足觀地而行爲避亂心爲護衆生故是名不退菩薩相又西國寺圖云行至佛所禮三拜竟圍繞三匝頌讚三契禮佛既已方至僧房房外一拜然後入見上座次第至下各設三拜僧多一拜若見非法之事不得譏訶若發言嫌責自失善利非入寺之宜故涅槃經云夫入寺者棄捨刀杖襍物然後入寺捨刀杖者去瞋恚三寶心也捨襍物者去從三寶乞求心也且除兩過乃可入寺順佛而行不得逆行設復緣礙左遶恒想佛在右入出之時悉轉面向佛禮拜三寶者常念體唯是一何者覺法滿足名佛所覺之道名法學佛道者名僧則知一切凡聖體同無二也若入寺

時低頭看地不得高視見地有蟲勿悞傷殺當歌唄讚歎不唾僧地若見艸木不淨即須除卻又四分律云入僧寺已應先禮佛塔次禮聲聞塔後禮第一上座乃至第四上座又五分律云若入僧多但別禮師餘人總禮而去又四分律云得禮出家五眾亾人塔及如來塔又五百問事云弟子得禮師塚以報恩故又增一阿含經云塔中不應禮餘人又十誦律云佛塔聲聞塔前自他不得禮又五百問事云佛塔前禮餘人得罪又三千威儀經云不得座上作禮今時數及以俗家見有道俗在牀上禮佛此大憍慢譬如欲拜人王豈得在牀拜人王尚自不許何況法王得相

此毗尼母論云不得著革屣富羅入塔此是鞞履總名五百

問事云若是淨潔鞞履鞋屐等得著禮拜僧祇律云若人禮拜不得如瘞羊不語當相問訊少病少惱安樂不道路不疲苦不已下廣明諸律

述曰若有士人或難因緣須至寺宿不得卧僧牀蓆必無私有偕卧如法然不得共僧同其牀卧故寶梁經云共僧同牀半身枯死墮地獄受其大苦僧未眠時不得在先眠不得調戲言笑說非法語失於威儀驚動眾心若有便利涕唾為求法宿不得出外者無犯眠時右脇著牀以脚相壘心係明相念當早起表

出家因也是故經云仰卧者是修羅卧伏地卧者是
餓鬼卧左脇卧者是貪欲人卧若右脇卧者是出家
人卧衆僧未起在前早起嚴儀容服至僧房前故沙
彌威儀經云若入師房應三彈指又三千威儀經云
若入師房當具五法一於外彈指二當脫帽三作禮
四正住教坐乃坐五不怠持經又僧祇律云弟子應
晨起先右腳入師房已頭面禮足問安眠不故善見
論云弟子參師當避六處一不得當前二不得當後
三不得太遠四不得太逼五不得處高六不得上風
立當不近不遠側相而立令師小語得聞不費尊力
也又欲行時威儀進止皆不得離師故善見論云弟
子從師行不得遠師七尺又沙彌威儀經云弟子從
師行不得以足踏師影

述曰若女人入寺法用同前但不得在男子上坐形
相語笑脂粉塗面畫眉假飾非法調戲共相排盪持
手振人必須攝心整容隨人教令依次持香一心供
養懺悔自責生女人中常成隔礙於此妙法修奉無
因不得自專由他而辦一何苦哉淡生悲悼若見沙
彌禮如大僧勿以小位而不加敬此於大僧爲小在
俗爲尊如此等法竭力而行法用旣多具在士女篇

述○述曰若男女所修事訖須欲出寺佛塔前設禮
三拜還須右遶三帀合掌頌讚然後却行出寺門外
復設一禮若見僧時徒衆若少各禮三拜僧若多時
總辭三拜故善現論云禮佛時應遶三帀三拜四方
作禮合十指掌又手於頂卻行而出絕不見如來更
復作禮迴前而去表慕戀三寶凡欲入寺之行爲作
出世之緣建立寺者開淨土之因供養僧者爲出離
之軌故惟穢俗之鄙質入伽藍之淨刹所有施爲恐
乖法式若也還家微捨自贖表僧有法施俗有財惠
舉動合宜內外俱益也頌曰

玄風冠西土	內範軼東矜	大川開寶匣
福地下金繩	繡松高可映	畫棋艷相承
日馭非難假	雲師本易憑	陽樓疑難燧
陰軒類鑿冰	迴題飛星沒	長楣宿露凝
旌門曙光轉	輦道夕雲蒸	祇洹多靈物
竹園滿休徵	虛薄筆難紀	微軀竊自凌
優遊從可恃	恩蔭永難勝	

感應緣

略引一十九寺

晉建元寺并建康太清寺
宋靈味寺在鍾山蔣林里

撰述
漢平等寺寺在南京

晉昇平白塔寺在秣陵三井里

晉白馬寺在建康中黃里

臨海天台山石梁聖寺

東海蓬萊山聖寺

抱罕臨河唐述谷仙寺

齊相州石鼓山竹林聖寺

晉陽冥寂山聖寺

代州五臺山大孚聖寺

魏太山丹嶺聖寺

雍州太一山九空仙寺

終南山大秦嶺竹林寺

子午關南獨聖寺

終南折谷炬明聖寺

終南庫谷內寺

西域志諸山感供聖寺

總述中邊化跡降靈記

晉建元寺建康太清里寺基本宋北第元徽二年宮
人陳太妃造寺塔舍利靈應相仍每夕放光寺大殿
後盡迦毗羅王及毗沙門天王二像若有僧侶失儀

童豎褻慢者無不影響表異使其恭肅若使虔誠懺禮標心懇切者必空中有彈指聲或循遶翼衛其間有請福祈願者莫不尅諧

宋靈味寺建康鍾山蔣林里宋永初三年沙門法意起造晉末有高逸沙門莫顯名迹巖栖谷飲常在鍾山之河一夜忽聞怪石崩墜聲振林薄明日履行唯見清泉湛然因聚徒結宇號曰靈味

漢平等寺廣平武穆王懷捨宅所立也寺門外有金像一軀高二丈八尺相好端嚴常有神驗國之吉凶先炳祥異孝昌三年十二月此像面有悲容坐淚編體皆濕時人號曰佛汗京師士女空市而觀有一比丘以淨綿拭其淚須臾之間綿濕都盡更以他綿換拭俄然復濕如此三日乃止至明年四月爾朱榮入洛陽誅戮百官死亾塗地至永安二年三月此像復汗京邑士庶復往觀視五月北海入洛莊帝北巡七月北海大敗所將江淮子弟五千餘人盡被俘虜無一得還永安三年七月此像悲泣復如初汗每經神驗朝野惶懼禁人不聽觀視至十二月爾朱兆入洛擒莊帝帝崩於晉陽宮殿空虛百日無主唯尚書令司州牧樂平王爾朱世隆鎮京師商旅四通盜賊不

作

晉白塔寺在秣陵三井里晉升平中有鳳凰集此地因名其處爲鳳凰臺至宋升平二年齊太祖起造立寺之始咸以山高難於谷汲比丘法和爰發誓云若此地可居當使自然出水乃於食堂前試鑿井曾不數仞而清泉湛然甘香清美涼未嘗竭

晉白馬寺在建康中黃里太興二年晉中宗元皇帝起造晉外國王欲滅佛法宣令四遠毀壞塔寺次招提寺忽有一白馬從西方來繞塔悲鳴騰躍空中或復下地一日一夜鳴聲不絕以事白王王潛淚淚自愧責卽勅普停已毀之塔並更修復由此白馬大法更興因改招提爲白馬此寺之號亦取是名焉

東晉初天台山寺者晉有沙門帛道猷或云竺道猷統涉山水窮枯奇異承天台石梁終古無度乃慷慨曰彼何人斯獨無貞操故使聖寺密爾對面千里遂揭錫獨往而趣石梁周瞰崖隄久之方獲其山石梁非一聖寺亦多將欲直度不憚形命且虹梁亘谷下望萬尋上闊尺許莓苔斜側東邊似通西礙大石攀登路絕猷乃別思冀授夜宿梁東便聞西寺磬聲經唄唱薩勇意相續通夕不安又聞聲曰卻後十年當

來此住何須苦求雖爾不息晨夕惋恨結艸爲庵彌
年禪觀後試造梁乃見橫石洞開梁道平正因卽得
度遂見棟宇宏壯圖塔瓌奇神僧叙接宛同素識中
食旣訖將陳住意僧曰卻後十年自當至此何勞早
住相送度梁橫石已塞至晉太元年終於山所形似
綠色端坐如生王羲之聞之造焉望崖仰挹今有往
者雲迷其道

宋時朱齡石者使往遼東還返失道隨風汎海一月
餘日達于一島糧水俱竭入島求泉漸淡登山乃見
一寺堂宇莊嚴非所曾覩僧問所從具說行事設食
飲水問以去畱石曰此乃聖居非凡可住僧曰欲住
任意石苦辭欲還僧告曰此間去都二十餘萬里石
等聞之驚怖曰若爾何緣得達僧曰自當相送不勞
致憂又問曰識杯度道人不曰識之便指壁上鉢袋
曰此是彼物有小過罰在人中便取鉢袋與石并書
一封上爲書字然不可識曰可以書鉢與之令沙彌
送勿從來道此有直路疾至船所須臾至海沙彌以
一竹杖著船頭語曰但閉舫聽往不勞航舵也於是
依言但聞颼颼風中聲有竊視者見船在空中雲飛奔
於山林海上數息間遂達楊都大桁正見杯度倚桁

欄口云馬馬齡石既至書自飛上度手度驚曰汝那得蓬萊道人書喚我歸耶乃說由緣又將鉢與之手捧鉢曰吾不見此鉢四千餘年擲上入雲下還接取太初中無故而死事在高僧傳

晉初河州唐述谷寺者在今河州西北五十里度風林津登長夷嶺南望名積石山卽禹貢導之極地也衆峯競出各有異勢或如寶塔或如層樓松栢映巖丹青飾岫自非造化神功何因綺麗若此南行二十里得其谷焉鑿山構室接梁通水遶寺華果蔬菜充滿今有僧住南有石門濱於河上鐫石文曰晉太始年之所立也寺東谷中有一天寺窮討處所略無定止常聞鐘聲又有異僧故號此谷名爲唐述羌云鬼也所以古今諸人入積石者每逢仙聖行住恍忽現寺現僧東北嶺上出於醴泉甜而且白服者不老高齊初有異僧投鄴下寺中夏坐與同房僧亡名欸曲意得客僧患痢甚困名以酒與之客曰不可也名曰但飲酒雖是戒禁有患通開客顰眉爲飲之患損夏滿辭還本寺相送出都客曰頗聞鼓山竹林寺乎名曰聞之古來虛傳竟無至者客曰無心相造何由而至一夏同房多相惱亂患痢飲酒乃是佳藥本非

所欲爲意而飲願不以此及人山寺孤迥時可歷覽
想一登陟以副虛懷名聞喜踊曰必能導達夕死無
恨至九月間尅望尋展幸賜提引不爾無由客曰若
來可從鼓山東面而上東度小谷又東北上卽是山
寺至期與好事者五六人直詣石窟寺山僧曰何以
得來曰欲往竹林道由於此僧曰世人可笑專聽妖
言此山東西我並遊涉何處有寺古有斯言不勞往
也名曰彼客致詞極非孟浪何有虛也只得尋之尋
而不獲非余咎也石窟寺僧十數相隨依言東上度
谷尋嶺忽見一翁把鑿斫地又見一僧來至鋤禾四

邊把鋤曳鑿曰去年官寺道人放馬食我禾盡今年
復來蹋我秋苗舉鑿趨僧並皆返歸唯名一人東北
獨上翁曰放你上山乞蟲喫卻遂依東上林水淡茂
聞南嶺上有吟詠聲名曰非往者客耶曰是也排榛
而出執手叙闊相將造寺瞬目間忽見崇峯遙日脩
竹干雲重門洞開複殿基列門外東西槽櫨飾以金
鋪似有馬蹤而無繫者行至門首曰且住此通和尚
去須臾便出引入至佛殿前禮拜訖西至廊下和尚
可年九十許眉長鼻高狀如西僧傍有官吏可三十
人執文簿有所判斷舉手告曰下里山寺殊無可觀

何能遠涉名卽禮拜十數拜和尚曰行來疲頓可止
將至房去便引西房北東轉見僧憑案讀經名便禮
拜都不慰問便引盡北行東出至本客房中歡笑通
宵屢求住彼曰一任和尚不敢爲礙待明爲諮報曰
和尚不許乃至中食不異鄴中臨別和尚曰知欲求
住知友情也然出家人不可兩處安名本寺受供可
得乖否必欲求住可除彼名好去便辭送出執手恨
恨旣別悽然行一里間數數反顧寺塔林竹依然滿
目更行二里返顧一無但是峯崖襍樹行行西下依
隨本道不見田苗亦無田翁乃至石窟備爲僧說之

高齊文宣在晉陽使人騎白駝向我寺取經函去
使問不知何寺帝曰但任駝行自知寺處日晚出城
駝行至急奄然如睡忽至一山名爲冥寂山半有寺
有羣沙彌曰高詳駝來也便引入寺見一老僧拜
已問曰高詳作天子何似答曰聖明問曰爾來何爲
答曰令取經函僧曰詳在寺懶讀經今取何用指示
北行東頭是其本房汝可彼取函與之卽乘駝而返
如睡如夢奄至晉陽以函及命不久帝行至谷口木
井寺有捨身癡人不解語忽語帝曰我先去爾後可
來帝然之是夜癡人死不久帝於晉陽不豫使劉桃

枝負行鼻血淋漓是夜帝崩。

代州東南五臺山古稱神仙之宅也。山方三百里極巉巖崇峻有五臺。上不生艸木唯松栢茂林。經中明文殊將五百仙人往清涼之山卽斯地也。地極嚴寒多雪號曰清涼山所以古來求道之士多遊此山遺迹靈窟卽自極多。中臺最高去頂七百里望如指掌上。上有小石浮圖其量千計卽是魏文帝宏所立也。石上人馬跡宛然如新。有大泉名曰太華清澄如鏡有二浮圖夾之中有文殊師利像人有至者鐘聲香氣無日不有神僧瑞像往往逢遇。龍朔二年下勅令長安會昌寺僧會曠往彼修理寺塔前後再返亦遇靈感。中臺東南下三十里有大孚靈鷲寺古傳漢明所造現有東西二道場像設猶存。南有華園二頃許四時相間互相映發古今常然。不知元由貞觀年中有禪師名解脫聚住習定自云於華園北四度見文殊師利菩薩翼從滿空羣仙異聖不可勝紀。近有僧朗禪師居山三十餘載亦遇仙聖飛空而去唯畱故皮南臺三十里內多是名華徧於峯岫俗號華山中有聖寺鐘聲時發曾見異人形偉冠世言語之間超騰遂遠其山甚近滯俗罕登登者必感勝緣。

魏太山丹嶺寺釋僧照未詳氏族性多虛放好追靈迹譎詭之處無不登踐永瀑布之下多諸洞穴仙聖遊止以魏普泰年行至滎山見飛流下有穴孔因穴而入行可五六里便得出穴外有微逕其東北上行數里得石渠闊三兩步水西流清澄徹上下藥艸蔓延委地青翠渠北有瓦舍三口形甚古陋庭前穀穀穗縱橫鳥雀殘食甚衆東頭屋內有數架黃麥中間有鐵臼兩具亦有金器並附遊塵都無炊爨之迹西頭室裏有一沙門端坐儼然飛塵沒膝四望瞻眺唯見茂林懸澗非有人居須臾之間逢一神僧年可

六十眉長丈餘槃掛耳上相見欣然傾慰若舊問所從來答云我同學三人來此避世一人外行未返一人死來極久似入滅定今在西屋內汝見之未今日何姓爲主答曰是魏家享國已久不姓曹耶照云姓元僧曰我不知之遂取穀穗擣之作粥又往林中葉下取梨棗與之令噉僧云汝但食之我不噉此又問誦何經業照云吾誦法華經神僧叩頭曰大好精進業今東屋架上如許經吾並自誦之欲得聞不照合掌曰唯敢聞命彼逐部別誦之聲氣朗徹乃至通夜照疲苦睡僧曰但睡我自恒業耳達旦不眠更爲造

食照謝曰幸得奉謁今暫還歸尋來接事僧亦不畱但言我同學行去汝若值者大有開悟恨不見之旣言須歸好去照尋路得還結侶重來瀑布覓穴莫測其處今終南諸山亦有斯事不可具述

雍州鄠縣南繫頭山寺者其山本舟人繫船其頂故以名焉。晉太一未分山連太行王屋白鹿河水停於此川號爲山海及巨靈大人秦供海者患水浩蕩以左掌托太華右足蹋中條太一爲之裂河通地出山遂高顯仍本號爲張衡馬西京云高掌遠蹠以流河曲者是也。古老傳云繫頭南有九空仙寺晉有人山採逼暮不知歸道依林而宿夜聞鐘聲在近卽尋之忽見一寺僧衆百餘但有行坐而不叙問其人怪之至明失寺此來在近無往尋者有僧曾至山但有層峯秀林不可登踐又云山有九窟仙人所居也有藍田大谷伏羲城側歸義寺僧弘藏者有膽勇聞而往尋積日累夜巡擾山隙止獲五窟甚圓淨如人所造無闕漏似有居者又光明寺了禪師亦往尋覓依窟一夏今所謂照陽空也足爲華望之大觀也而仙寺終不見焉

終南山大秦嶺竹林寺者至貞觀初採蜜人山行聞

撰述
有鐘聲尋而往至焉寺舍二間有人住處傍大竹林
可有二頃其人斷二節竹以盛蜜可得五升許兩人
負下尋路而至大秦戍具告防人以林至此可十五
里戍主利其大竹將往伐取遣人依言往覓過小竹
谷達于崖下有鐵鎖長三丈許防人曳鎖掣之大牢
將上有二大虎據崖頭向下大呼其人怖急返走又
將十人重尋值大洪雨便返藍田悟真寺僧歸真少
小山栖聞之便往至小竹谷北上望崖失道而歸常
以爲言真云此竹林至關可五十許里

子午關南第一驛名三交驛東有澗東南坡數十頃
是栗樹素不知有僧住屢聞鐘聲不以爲奇一時驛
家婦女採樵入澗忽值一僧獨坐石上縫衣傍無一
物此女有信心白曰不知師在此日時欲至向驛食
來僧云貧道山居不得食驛家官食女曰自有私食
足以供養僧曰信心人食亦不可得女恐時過馳走
取食及來尋之不見其迹由是常令家人左近追之
永不可值而有鐘聲此寺去驛五里
又終南折谷內櫻蘭寺者近有人見一僧云倩爲擎
樸向寺問寺在何處云在折谷炬明東額頭其人爲
荷樸將至寺見一僧從南崖來可長五十尺相召來

其人辭返語曰君日日入山採柴可於柴下取齋殘餅食之不須道得之由緣便隨其言日得其餅妻怪竈之不得已便說遂瘕經年又見二僧入谷其人手招指口如是三返便得語其人近死今入山者至炬明額側常聞鐘聲亦往往見有異僧近有一僧聞已遇見入谷僧疑是椶蘭寺問言大德是椶蘭寺僧不曰是欲隨大德去得不曰可相隨來但聞耳邊颼颼風聲至急心惟曰此何必是聖或入淡山躡頓我竊生念時前僧便失懊惱之甚返迴三日方達谷口乃於避世譽立精舍以之精舍見存其僧不知所終又終南庫谷內西南又名胡盧谷嘗有人於山採斫遇見一寺并石室石門門內並寶器重大不可勝然不見僧人是衆僧供用具度其人徘徊顧眄記誌處所以所齋瓠盧掛於室樹下山召村人往尋其谷內樹上往往悉是瓠盧莫知蹤跡今有尋山云石門扇在山崖傍半入山下其半雖出無人力開之今其谷名庫地名天藏故谷口府坊皆名天藏測其山中則彌勒下生方現於俗耳

西域志云烏菴國西南有檀特山山中有寺大有衆僧日日有驢運食無控御者自來畱食還去莫知所

撰述
西域志云王玄策至大唐顯慶五年九月二十
七日菩提寺寺主名戒龍爲漢使王玄策等設大會
使人已下各贈華氎十段并食器次申呈使獻物龍
珠等具錄大真珠八箱象牙佛塔一舍利寶塔一佛
印四至於十月一日寺主及餘衆僧餞送使人西行
五里與使泣涕而別曰會難別易物理之況龍年老
此寺卽諸佛成道處爲奏上於此存情預修當來大
覺之所言意勤勤不能已已

若廣明西域塔寺靈迹
嘉祥徵瑞具如上感通

篇
述

敬尋佛法東流年向六百三寶傳記卷盈三千其內
名僧德重可觀神通變化靈瑞感通向有千人自古
君臣隱道逸民負才傲俗之流並皆崇敬如賢如聖
備在傳記不可具述故入大乘論云尊者聖人賓頭
盧羅睺羅等有十六大阿羅漢住世通法又有九億
無學聖人亦在此洲未入涅槃准此而詳今諸山海
所居衆僧多聞磬聲或尋遇寺豈非聖人之所處乎
今更約諸門以分三時一約住世二約賢劫三約釋
迦一佛爲候初約住劫用辯通塞者如西域所列往
劫行事如薩埵捨身流血尚在達拏捨子杖擗遺血
布髮掩泥之所捨身求偈之地月兂斬首尸毗飼鷹

斯等遺跡並惟古劫計數災蕩如何尚存天竺名僧亦疑斯致理如所問無宜獨留而往事迹有僧釋云此乃如來神力由菩薩志行雖有三災不可除滅後成世界依而集之亦有人言三災之化無往不除乃至無一鄰塵而得存焉今云塔在豈不乖乎諸德釋云但非聖跡者如無一鄰得住今云有者由聖力加被故得久住欲使後代師之鑽仰冀慕聖蹤依之得道世界初成管古遺跡相似而現並是佛之神力變化所爲故五不可思議中一是佛神力也所以往劫生事而列之第二約同劫以明相對有四具如一鉢千佛共同故傳云釋迦受食四王奉鉢滅後流行王毗舍離若干百年又至乾陀衛又至西月支于闐丘夷美當達震旦返向師子國還來天竺上昇兜率彌勒見曰釋迦佛鉢今來至此七日供養還下龍宮彌勒成佛四王還獻二者龍宮佛影千佛同留三者方石說法千佛同坐卽捷陀卑鉢樹下是也四者石塔盛衰千佛同候上傳之中多明四佛行坐之跡准此未來抑亦可見第三明釋迦一代通而不等如天道寶階滅無遺緒吒王大塔七化已三道樹滅而更生佛跡毀而還現楊枝摧而重出舍利試而逾靈諸如

此例故應不通後佛至如雞足迦葉畱化慈尊山宮
明辯持身滅定之侶摩支應供之徒事局未來神化
絕域皆爲明通開顯累俗慈導有情澄神諸有也依
道宣律師感應記問天人曰荊州河東寺者此國甚
大余與慈恩寺嵩法師交顧積年其人卽河東羅雲
法師之學士也云此寺本曾住萬僧震旦之最聞之
欣然莫測河東之號請廣而述之亦佛法之大觀也
答曰晉氏南遷郭璞多聞之士周訪地圖云此荆楚
舊爲王都欲於硤州置之嫌逼山遂止便有宜都之
號下至松滋地有面勢都邑之像乃掘坑秤土嫌其
太輕覆寫本坑土又不滿便止曰晉金陵王氣於今
不絕固當經三百年矣便都建業仍於此置河東改
遷裴薛柳杜四姓居之地在江曲之間類蒲州河曲
故有河東目也有東西二寺晉符堅伐晉荊州北岸
並沒屬秦時桓仲爲荆牧邀翼法師度江造東寺安
長沙寺僧西寺安四層寺僧符堅歿後北岸諸地還
屬晉家長沙四層諸僧各還本寺西東二寺因舊廣
立自晉宋齊梁陳氏僧徒常數百人陳末隋初有名
者三千五百人淨人數千大殿一十三間惟兩行柱
通梁長五十五尺欒樞重疊國中京冠卽彌天釋道

安使弟子翼法師之所造也自晉至唐曾無虧損殿
前四鐵鑊各受十餘斛以種蓮華殿前塔宋謙王義
季所造塔內素像忉利天工所造佛殿中多金銅像
寶帳飛仙珠瓔華珮並是四天王天人所作寺內僧
衆兼於主客出萬餘人當途講說者五十三人十三
人得其聖果各領千僧餘小法師五百餘人十誦律
師有四十人九人得聖大小乘禪師八百餘人其得
聖人二百二十四人徒衆嚴肅說不可盡寺法立制
誦經六十紙者免維那誦法華度免直歲寺房五重
並皆七架別院大小今有十所般舟方等二院莊嚴
窳勝夏別常有千人四周廊廡成一萬間寺開三門
兩重七間兩廈殿宇橫設並不重安約准地數取其
久故所以殿宇至今三百年餘無有損敗東川大寺
唯此爲高映耀川原實稱壯觀也又問彌天釋氏宇
內式瞻云乘赤驢荆襄朝夕而見未審如何答曰虛
也又曰若爾虛傳何爲東寺上有驢臺峴南有中驢
村據此行由則乘驢之有地也答曰非也後人築臺
於植樹供養焉有佛殿之側頓置驢耶又中驢之名
本是閭國郟國之故地也後人不練遂妄擬之
法苑珠林卷第五十二

校譌

第二紙

七行是宋藏作良

第七紙

十二行生宋南藏作主

第十五紙

十九行水北藏作米

第二十五紙

二十行具宋南藏作生

音釋

締

丁計切結也

慘

七感切感也

蟻

梵語也此云貝王名也蟻汝陽切

丘迦切

鞞

許戈切有鞞履也

鞞

莫葛切

盪

徒黨切推盪也

振

除庚切觸也

醉切

俘

芳蕪切軍所虜獲也

瞰

苦濫切俯視也

賺

魚檢切山形如重甌日賺

烏貫切

瓌

姑回切也

颼

疏鳩切颼風聲也

輦

毗賓切輦感也

斲

竹角切

也

榛

鉏臻切木叢生也

造

初救切衝也

穗

徐醉切禾穎也

鄂

侯古切縣名

之石切

挫

主藥切杖擊也

飼

祥吏切餒也

歙縣居士吳惟明施贊刻此法苑珠林第五十二卷吳江比丘明覺對真州王國英書金陵沈一龍刻萬曆辛卯秋清涼山妙德庵識

法苑珠林卷第五十三

唐上都西明寺沙門釋道世玄暉撰

舍利篇第三十七

述意部

夫聖德遐邈冠絕人天理妙六經神高百氏超羣有之遺蹤越賢良之勝迹化緣既終從俗韜允故雙樹八枝隨義所表舍利八分亦遂緣感會入金剛定預碎全身欲使福被天人功流海陸至於牙齒髮爪之屬頂蓋目睛之流衣鉢瓶杖之具坐處足蹈之迹囊括今古聖變無窮祥應荐臻瑞允頻朗賢愚共覩豈

猜來惑且如三皇五帝夏殷文武孔丘莊老惟聖惟賢共遵共敬莫不葬骨五泉遺塵九土聲光寂寞孰識其蹤罕知生福奚感來報豈比能仁大聖形影坐芳應感之道不窮敬仰之風逾遠紹化迹於大千拔沉冥於沙界致使開示之道隨義或殊會空之旨齊其一實也

引證部

舍利者西域梵語此云骨身恐濫凡夫死人之骨故存梵本之名舍利有三種一是骨舍利其色白也二是髮舍利其色黑也三是肉舍利其色赤也菩薩羅漢等亦有二種若是佛舍利椎打不碎若是弟子舍利椎擊便破矣又菩薩處胎經云世尊告諸大眾念我古昔所行功德捨身受身非一非二今當爲汝說一形法諸佛全身舍利盡在下金剛剎中金剛剎厚八十四萬億里下有諸佛碎身舍利盡在彼剎彼有佛剎名曰妙香佛名不住如來十號具足今現在說法佛告大眾碎身舍利下厚八十四萬億里國土清淨佛名徧光十號具足彼佛今現在說法復下有國土名施無盡藏佛名勸助復下有國土名法鼓佛名善見彼土乃有全身舍利過去億千萬佛皆畱舍

利彼土舍利我亦有分又海龍王經云爾時諸龍白
佛言今世尊還閻浮利地海中諸龍無所依仰惟加
大哀佛滅度時在此大海留全舍利一切衆類皆得
供養轉加功德速脫龍身疾得無上正真之道唯佛
坐恩威德兼加所願得果佛言善哉從爾所志須菩
提謂諸龍言一切人天舍利須徧普蒙獲濟卿等求
願使佛舍利獨全奉侍一切衆生何緣得度諸龍答
言唯須菩提勿宣斯言無以已身限礙之智以限如
來無極之慧如來聖德無不變現三千世界各各化
現佛全舍利不增不減普現一切譬如日影現於水
中佛亦不生亦不滅度云何欲限如來智慧者乎須
菩提聞默而無言佛歎諸龍仁等賢明誠如所云無
有異也佛道高妙無邊無際無方無圓無廣無狹無
遠無近譬如虛空不可爲喻

佛影部

如觀佛三昧經云佛初留影石室在耶乾呵羅國毒
龍池側阿那斯山巖南有五羅刹女與毒龍通恒降
雨雹百姓饑疫已歷四年時王禱祀呪龍羅刹女氣
盛咒術不行王長跪合掌讚佛通慧應知我心願屈
慈悲允臨此國爾時如來往至彼國龍與雷電鱗甲

烟焰五羅刹女眼如掣電時金剛神手把大杵杵頭
火然如旋火輪燒惡龍身龍王驚怖走入佛影如甘
露灑見諸金剛極大惶怖爲佛作禮五羅刹女亦禮
如來龍王於其池中出寶臺奉佛佛言不須汝臺但
以羅刹石窟施我諸天各脫寶衣拂窟佛攝神足獨
入石室令此石上變爲七寶時龍爲四大弟子及阿
難造石窟爾時世尊從石窟出時龍聞佛還國啼哭
雨淚云何捨我我不見佛當作惡事墜墮惡道佛安
慰龍我受汝請當坐汝窟中經千五百歲佛坐窟中
作十八變踊身入石猶如明鏡在於石內映現於外
遠望則見近望不現諸天百千供養佛影影亦說法
迄今猶現

分法部

如菩薩處胎經云時八國王共諍舍利有一大臣名
優波吉諫八國王何爲興兵共相征伐爾時帝釋卽
現爲人語王言我等諸天亦當有分若共諍力則有
勝負幸可見與勿足爲難爾時阿耨達龍王文鄰龍
王伊那鉢龍王語八王言我等亦應有分若不見與
力足相伏時臣優波吉告言諸君並止舍利宜共分
之何須見諍卽分爲三分一分與諸天一分與龍王

一分與八王分甕受一石餘此臣以蜜塗甕裏以甕
量分諸天得舍利還於天上卽起七寶塔龍得舍利
還於宮中起七寶塔臣優波吉者甕舍利并甕亦起
寶塔灰及土量得四十九斛亦起四十九寶塔闍維
處亦起寶塔高三十九仞一刃七尺又阿育王經云八國
王諍舍利各起兵天帝釋自下曉喻以金甕分之闍
王共數各得八萬四千舍利惟有佛口一髭無敢取
者以闍王初來得舍利及髭還大歡喜作樂動天難
頭禾龍王化作人身到泥洹所道逢闍王還語王言
可持一分見與王言不可得龍王言我是難頭禾龍
能舉卿國土著八萬里外磨碎成屑闍王怖懼卽奉
佛髭與之龍王卽還須彌山下起水高八萬四千里
起水精瑠璃塔闍王終後阿育王得其國土時有大
臣白阿育王言難頭禾龍先輕闍王奪佛髭去阿育
王聞大瞋怒卽勅諸鬼神王作鐵網鐵冑縱冑須彌
山下水中欲縛取龍王龍大驚怖共設計言阿育事
佛當伺其卧取宮殿移著須彌山下水中其瞋必息
卽便遣龍捧取育王宮殿王卧覺不知是何處見水
精塔高八萬四千里喜怖交心龍自出謝言闍王自
與我佛髭我不奪也佛在世時與我要言般泥洹後

劫盡之時所有經戒及袈裟應器我皆當取藏著是塔中彌勒來下當復出著阿育王聞此言大謝實不知此龍王便使諸龍還復王宮殿置於本處又善見論云帝釋宮內有二舍利一佛右牙二佛右闕甕骨又十誦律云佛般泥洹八國皆來求舍利各舉四兵八軍圍遶有一婆羅門姓煙高聲大唱言諸力士舍利現在當分作八分諸力士言敬如來議更復唱言盛舍利瓶請以見惠還頭那羅聚落起塔時畢波羅延那婆羅門復請燒佛處炭還國起塔時拘尸城力士得第一分起塔舍利卽於國中起塔波婆國得第二分舍利還歸起塔羅摩聚落拘樓羅得第三分舍利還歸起塔遮勒國諸刹帝利得第四分還國起塔毗兜諸婆羅門得第五分還國起塔毗耶離諸利昌得第六分還國起塔迦毗羅婆國諸釋子得第七分還國起塔摩伽陀國主阿闍世王得第八分還王舍城起塔姓煙婆羅門得盛舍利瓶還頭那羅聚落起塔畢波羅延婆羅門得炭還國起塔爾時閻浮提中八舍利塔第九瓶塔第十炭塔自此已後起無量塔又阿育王經云管阿怒伽王欲取阿闍世王所舉舍利阿闍世王著洹河中作大鐵劔輪使水輪轉著舍

利處種種方便取不能得問蓮華比丘云何可得比
丘答言擲數千斛奈著中可得止輪尋用此語以奈
著於水中偶試一柰柰隨機關孔中劍輪卽定更不
迴轉然大龍王守護都不可得王時問言何由可得
答言龍王福勝無由可得問言云何知彼福勝以金
鑄作龍像及以王像以秤稱之重者福勝卽時稱量
龍像倍重王見此事卽勤修福旣修福已復更鑄像
復更稱量王像龍像稱量正等王更修福復更鑄像
稱看王像轉重王知像重將諸軍衆往到水邊龍王
自出獻種種寶王語龍言阿闍世王遺我舍利我今
欲取龍王自知威力不如卽將王至舍利所開門取
舍利與阿闍世王所造油燈始欲盡餉舍利旣出燈
亦盡滅王怪而問蓮華比丘云何阿闍世王裁量油
燈至取舍利方始乃滅尊者答言彼時有善筭者計
百年中用爾許油用如是計故使至今也

感福部

如大悲經云爾時世尊告阿難我滅度後若有人乃
至供養我之舍利如芥子等恭敬尊重謙下供養我
說是人以此善根一切皆得涅槃界盡涅槃際若有
造立形像塔廟乃有信心念佛功德乃至一華散於

空中我說是人以此善根一切皆當得涅槃界盡涅槃際佛告阿難若有衆生以念佛故乃至一華散於空中如是福德所得果報不可窮盡若有衆生以至誠心念佛功德乃至一華散於空中於未來世當得釋天王梵天王轉輪聖王於其福報亦不能盡施佛福田不以有爲果報所能盡邊我說是人必得涅槃盡涅槃際乃至若有畜生於佛世尊能生念者我亦說其善根福報當得涅槃盡涅槃際若有三千大千世界滿中四沙門果及辟支佛如甘蔗竹筴若有人能若現在若滅後起塔供養若一劫若減一劫以諸稱意一切樂具恭敬尊重謙下供養若復有人於諸佛所但一合掌一稱佛名如是福德比前福德百分不及一千分百千億分乃至迦羅分不及一何以故以佛如來諸福田中爲最無上是故施佛成大功德神通威力頌曰

金軀遺散骨	寶塔徧天龍	剗開於十塔
終成八萬興	珠蓋靈光變	刹柱吐芙蓉
屢開朝霧露	數示曉靈徵	紅霓相映發
風搖響和鐘	仙鸞往往見	神僧數數從
獨超羣聖上	含識普生恭	砧椎擊不碎

方知聖叵窮

感應緣

略引一十六驗
隋有五十三州

漢僧道肉法

魏外國沙門金盤貯舍利五色騰焰

吳康僧會祈舍利

孫皓毀法舍利揚彩

晉竺長舒以舍利投水中五色光現

晉董汪家木像舍利發光

晉廣陵舍利放光

晉北僧法開建寺求舍利

晉孟景建寺獲舍利三顆

晉義熙有一舍利自分爲三

宋賈道子於芙蓉內得一舍利

宋安千載家奉佛得舍利

宋張須元家於像前華上得舍利數十顆

宋劉凝之額下得舍利二枚

宋徐椿讀經得二舍利

漢法內傳云明帝旣弘佛法立寺度僧五岳山館諸

道士等請求肉試釋老優劣道經以火試焚隨火消

盡道士衆首費才愧耻自感衆前而死張衍啓悟競

共出家于時西域所將舍利五粒五色直上空中旋環如蓋映蔽日炎摩騰羅漢踊身高飛居空如地履地如空神化自在爲衆說法天雨寶華散佛僧上天樂異音大衆同聞度人無量廣如下破邪篇說魏明帝洛城中本有三寺其一在宮之西每繫舍利在旛刹之上輒斥見宮內帝患之將毀除壞時有外國沙門居寺乃齎金盤盛水水貯舍利五色光明騰焰不息帝見歎曰非夫神効安得爾乎乃於道東造周閭百間名爲官佛圖精舍矣

吳孫權赤烏四年有外國沙門康僧會創達江表設像行道吳人以其爲妖異以狀聞之權召會問佛有何靈瑞曰佛晦靈迹遺骨舍利應現無方權曰何在曰佛神迹感通祈求可獲權曰若得舍利當爲興寺經三七日至誠求請遂獲瓶中且呈於權炎照宮殿權執瓶寫于銅盤舍利下衝盤卽破碎權大驚異希有瑞也會進曰佛之靈骨金剛不朽劫火不焦椎砧不碎權使力者盡力擊之椎砧俱陷舍利不損炎明四射耀晃人目又以火燒騰光上踊作大蓮華權大發信乃爲立寺名爲建初改所住地名佛陀里孫皓虐政將欲除屏佛法燔經夷塔有臣諫曰且少

寬假知無神驗誅除不晚皓從之召會曰若能驗現於目前助君興之如其不能將廢加戮會曰佛以緣應感而必通既給假請効不難皓與期三日于時僧衆百餘同集會寺皓陳兵圍寺刀鋸齊至剋期就戮僧恐無靈先自縊者會謂衆曰佛畱舍利止在今時前已有驗今豈罔哉恰期便獲乃進於皓此是如來金剛之骨志誠貴獲設以百鈞之杵終無微毀皓曰金石可磨枯骨豈堅沙門面欺抵速死耳乃更置之鐵砧以金椎擊之金鐵並凹而舍利如固又以清水行之舍利揚爍散彩洞燭一殿皓乃欣欣伏信革誠膺化

晉初竺長舒先有舍利重之其子爲沙門名法顏每欲還俗笑曰舍利是沙石耳何足可貴父投之水中五色三帀炎高數尺見徵生信遂不歸俗長舒臨死還發俗念輒病委頓卒爲沙門以舍利安江夏塔中晉大興中於潛董汪信尚木像夜有光明後像側有聲投地視乃舍利水中浮沉五色晃昱右行三帀後沙門法恒看之遂騰踊高四五尺投恒懷中恒曰若使恒興立寺宇更見威神又躍于前於卽恒建寺塔於潛入法者日以十數焉

晉大興中北人流播廣陵日有千數有將舍利者建立小寺立刹舍利放光至于刹峯感動遠近

晉咸和中北僧安法開至餘杭欲建立寺無貲財手索錢貫貨之積年得錢三萬市地作屋常以索貫爲資欲立刹無舍利有羅幼者先自有之開求不許及開至寺禮佛見幼舍利囊已在座前卽告幼幼隨來見之喜悅與開共立寺宇於餘杭也

晉咸康中建安太守孟景欲建刹立寺於夕聞牀頭鏘然視得舍利三枚因立寺刹元嘉十六年六月舍利放光通照上下七夕乃止一切咸見

晉義熙元年有林邑人嘗有一舍利每齋日有光沙門慧邃隨廣州刺史刁逵在南敬其光相欲請之未及發言而舍利自分爲二逵聞心悅又請畱敬而又分爲三逵欲摸長干像寺主固執不許夜夢人長數丈告曰像貴宣導何苟吝耶明報聽摸旣成逵以舍利著像髻中西來諸像放光者多由舍利故也

宋元嘉六年賈道子行荆上明見芙蓉方發聊取還家聞華有聲怪尋得一舍利白如眞珠焰照梁棟敬之擎以箱案懸于屋壁家人每見佛僧外來解所被衣雖坐案上有人寄宿不知汗漫之乃夢人告曰此

有釋迦真身衆聖來敬爾何行惡死墮地獄出爲奴婢何得不怖其人大懼無幾癩死舍利屋地生荷八枝六旬乃枯歲餘失之不知所去

宋元嘉八年會稽安千載者家門奉佛夜有扣門者出見十餘人著赤衣運財積門內云官使作佛圖忽無所見明至他家齋食上得一舍利紫金色椎打不碎以水行之光明照發便自舉敬常有異香後出欲禮忽而失之尋覓備至半日還時臨川王鎮江陵迎而行之襍炎間出佐史沙門咸見不同王捧水器咒曰云云輒應聲炎出夜見百餘人遶舍利屋燒香持華如佛出狀及明人及舍利俱失

宋元嘉九年潯陽張須元家設八關齋道俗數十人見像前華上似冰雪視得舍利數十便以水行之炎焰相屬後遂之數日開厨更視獲牙奩中有白氎裹舍利十枚光焰屬諸處咸來請之

宋元嘉十五年南郡劉凝之隱衡山徵不出奉五斗米道不信佛法夢見人去地數丈曰汝疑方解覺忽反悟旦夕勤至半年禮佛忽見額下有紫炎揣炎處得舍利二枚割擊不損水行炎出復於食時口中隱齒吐出有炎妻息又獲一枚合有五枚後又失之尋

爾又得

宋元嘉十九年高平徐椿讀經及食得二舍利盛鬻中後看漸增乃至二十後寄廣陵令劉馥馥私開之空鬻椿在都忽自得之後退轉皆失舍利應現值者甚多皆敬而得之慢而失之舍利東流綿歷帝代傳記所及略陳萬一由事相重杳屢現非奇佛化潛隱誠其致也然有國興塔無勝隋代一化之內百有餘所神瑞開發陳諸別傳今略出之以顯感德也

隋文帝立佛舍利塔

二十八州起塔五十三州感瑞

雍州仙遊寺

岐州鳳泉寺

華州思覺寺

同州大興國寺

涇州大興國寺

蒲州栖巖寺

秦州岱岳寺

并州無量壽寺

定州恒岳寺

嵩州閑居寺

相州大慈寺

廓州連雲岳寺

衡州衡岳寺

襄州大興國寺

牟州巨神山寺

吳州大禹寺

蘇州虎丘山寺

右此十七州寺起塔出打刹物及正庫物造

秦州

瓜州

楊州

益州

亳州

桂州

交州

汝州

番州

蔣州

鄭州

右此十一州隨逐山水州縣寺等清淨之處
起塔出物同前也

門下仰惟正覺大慈大悲救護群生津梁庶品朕歸
依三寶重興聖教思與四海之內一切人民俱發菩
提共修福業使當今見在爰及來世永作善因同登
妙果宜請沙門三十人諳解法相兼堪宣導者各將
侍者二人并散官各給一人熏陸香一百二十斤馬
五疋分道送舍利往前件諸州起塔其未注寺就有
山水寺所起塔依前山舊無寺者於本州內清淨寺
處建立其塔所司造樣送往本州僧多者三百六十
人其次二百四十人其次一百二十人若僧少者盡
見在僧爲朕皇后太子諸王子孫等及內外官人一
切民庶幽顯生靈各七日行道并懺悔起行道日打
刹莫問同州異州任人布施錢限至十文已下不得
過十文所施之錢以供營塔若少不充役丁及用庫
物率土諸州僧尼並爲舍利設齋限十月十五日午
時同下入石函總管刺史以下縣尉以上自非軍機
停常務七日專檢校行道及打刹等事務盡誠敬副
朕意焉主者施行 仁壽元年六月十三日內史令
豫章王臣暕宣

舍利感應記二十卷

隋著作郎
王邵撰

皇帝嘗在潛龍有婆羅門沙門來詣宅上出舍利一

裏曰檀越好心故畱與供養沙門既去求之不知所
在。其後皇帝與沙門曇遷各置舍利於掌而數之。或
少或多。並不能定。曇遷曰。曾聞婆羅門說法。身過於
數量。非世間所測。於是始作七寶箱以置之。神尼智
仙言曰。佛法將滅。一切神明。今已西去。兒當爲普天
慈父。重興佛法。一切神明還來。其後周氏果滅佛法。
隋室受命。乃興復之。皇帝每以神尼爲言。云我興由
佛。故於天下舍利塔內各作神尼之像焉。皇帝皇后
於京師法界尼寺造連基浮圖。以報舊願。其下安置
舍利。開皇十五年季秋之夜。有神光自基而上。右遶
露盤。赫若冶鑪之燄。其旬內四度如之。皇帝以仁
壽元年六月十三日。御仁壽宮之仁壽殿。本降生之
日也。歲歲於此日。淡心永念。修營福善。追報父母之
恩。故延諸大德沙門。與論至道。將於海內諸州。選高
爽清靜三十處。各起舍利塔。皇帝於是親以七寶箱
捧三十舍利。自內而出。置于御座之案。與諸沙門燒
香禮拜。願弟子常以正法護持三寶。救度一切衆生。
乃取金瓶。瑠璃瓶各三十。以瑠璃瓶盛金瓶。置舍利
於其內。熏陸香爲泥塗其蓋。而印之。三十州同刻。十
月十五日正午。入於銅函石函。一時起塔。諸沙門等

各以舍利奉送諸州一切道俗各盡境內嚴持香華
寶幢音樂掃灑道路盡誠竭力奉迎舍利不可具陳
各感靈瑞備如廣傳今略寫十餘以示後人皇帝爾
日共皇后太子宫內妃嬪精誠用心竭力懺悔普爲
舍識共結善緣皇帝見一異僧被褐色覆膊以語左
右曰勿驚動他置之爾去已重數之果不須現舍利
之將行也皇帝曰今佛法重興必有感應其後處處
表奏皆如所言皇帝當此十月之內每因食次於齒
下得舍利皇后亦然以銀盤盛水浮其一出示百官
須臾忽見有兩粒右旋相著二貴人及晉王昭豫章
王暕蒙賜蜺勅令審視之各於蜺內得舍利一未過
二旬宮內凡得十九多放光明自是遠近道俗所有
舍利率奉獻焉皇帝曰何必皆是真身諸沙門相與
椎試之果有十三玉粟其真舍利鐵窻而無損

雍州城西盤屋縣南仙遊寺立塔之日天降陰雪晦
嶺重厚舍利將下昏雲忽散日光朗照道俗散畢雲
合如舊

岐州鳳泉寺立塔感得文石如玉爲函又現雙樹鳥
獸靈祥基石變如水精

華州思覺寺立塔初陰雪將欲下舍利日光晃朗五

色氣炎高數十丈照覆塔上屬天降寶華

同州大興國寺立塔值雨無壅鄣處及舍利入函忽然雲啓馳散日炎照曜復有神炎重遶於日至十二月內夜炎照五十里

涇州大興國寺立塔三處各送舊石非世所有合用爲函恰然相可

蒲州栖巖寺立塔地震山吼鐘鼓大聲又放炎五道至二百里皆見

秦州岱岳寺立塔夜振鼓聲三重門自開有騎從廟迎炎瑞非一

并州無量壽寺立塔初晝昏雲重將下舍利入函天晴日照復放神炎五道天神現形莫知多少

定州恒岳寺立塔之日有見異老公來施布負土畢已失之舊此無水忽有水流前後非一

嵩州閑居寺立塔感得白兔來至舉前初陰雪將下日朗入已復合

相州大慈寺立塔之日天陰降雪將下舍利入函日出下後復合天雨奇華連注極多

廓州法講寺立塔初行郊西爾夜廓州炎瑞高數丈從東來入地內外皆見

蔣州栖霞寺立塔隣人先夢佛從西北來入寺及至如夢

鄭州定覺寺立塔之日感得神光如流星入寺設供二千萬人食不盡

隨州智門寺立塔掘基得神龜甘露降黑蜂遶龜有

符文

此下非二十八州數

隨州官人王威送流人九十道逢舍利善心共發放之爲期其囚被放千里一期無一逃者隨州人於湏水作魚獄三百古來傳業旣見舍利悉決放之永斷茲惡餘州亦効矣

青州勝福寺起塔掘基遇自然盤石函將入塔有光瑞現

慶舍利感應表

并答

隋安德王雄百官等臣雄等言臣聞大覺圓備理照空有至聖虛凝義無生滅故雖形分聚芥尚貯金鬕體散吹塵猶興寶刹自釋提請灰之後育王建塔以來未有分布舍利紹隆勝業伏唯皇帝積因曠劫宿證菩提降迹人皇護持世界往者道消在運仁祠廢毀慈燈滅影智海絕流皇祚旣興法鼓方振區宇之內咸爲淨土生靈之類皆覆梵雲去夏六月爰發詔

旨延請沙門奉送舍利於三十州以十月十五日同時起塔而蒲州栖巖寺規模置塔之所於此山上乃有鐘鼓之聲舍利在講堂內其夜前浮圖之上發大光明爰及堂裏流照滿室將置舍利於銅函又有炎若香鑪乘空而上至浮圖寶瓶復起紫燄或散或聚皆成蓮華又有光明於浮圖上狀如佛像華趺宛具停住久之稍乃消隱又有光明遶浮圖寶瓶蒲州城內仁壽寺僧等遙望山頂如樓闕山峯澗谷昭然顯現照州城東南一隅良久不滅其栖巖寺者卽是太祖武元皇之所建造又華州置塔之處于時雲霧大雪忽卽開朗正當塔上有五色相輪舍利下訖還起雲霧皇帝皇后又得舍利流燭散彩或出或沉自非至德精誠道合靈聖豈能神功妙相致此奇特臣等命偶昌年旣覩太平之世生逢善業方出塵勞之境不勝抃躍謹奉拜表陳賀以聞謹奏○勅答門下仰惟正覺覆護群品濟生靈於苦海救愚迷於火宅朕所以至心迴向結念歸依思與率土臣民爰及幽顯同崇勝業共爲善因故分布舍利營建神塔而大聖慈愍頻示允相宮殿之內舍利降靈莫測來由自然變現歡喜頂戴得未曾有斯實群生多幸延此嘉福

豈朕微誠所能致感覽王公等表悚敬彌渎朕與王
公等及一切民庶宜更加尅勵興隆三寶今舍利真
形猶有五十所司可依前式分送海內庶三塗六道
俱免益纏冥識含靈同登妙果主者施行○高麗百
濟新羅三國使者將還各請一舍利於本國起塔供
養詔並許之詔於京師大興善寺起塔先置舍利於
尚書都堂十二月二日日旦發焉是時天色澄明氣和
風靜寶輿幡幢香華音樂種種供養彌徧街衢道俗
士女不知幾千萬億服章行位從容有叙上柱國司
空公安德王雄以下皆步從至寺設無遮大會而禮
懺焉有青雀狎於衆內或抽佩刀擲以布於當人叢
而下都無所傷

仁壽二年正月二十三日復分布五十三州建立靈
塔令總管刺史已下縣尉以上廢常務七日請僧行
道教化打刹施錢十文一如前式期用四月八日午
時合國化內同下舍利封入石函所感瑞應者別錄
如左

恒州

無雲雨下天降瑞華徧城如此

泉州

循州

營州

三放白光感得古石解作函

洪州

白頭鳥引路無窮

杭州 掘墓有白石函涼州

德州 感得大鳥旋滄州

觀州 塔上五色雲現從午至暮

瀛州 基內有紫芝現

冀州 有患盲人及躄皆差

幽州 函如水鏡放光眾像

徐州 函現仙人聖僧等相

莒州 三視神光基得齊州萊州

楚州 野鹿來聽鴈翎塔上

江州 地出銅像

潭州 舍利至江神鳥千迎

毛州 天兩金貝州

宋州 井苦變甘旋光天雨瑞華如雪

趙州 放赤光瑞像無量

濟州 二放神光香氣充州 壽州 信州

荊州 雲蓋塔上雨華不下

蘭州 基下得石像又得二銅像梁州

利州 放光如月明

潞州 靈泉自涌病遇得差

黎州 地 下 凡 聞 千 秋 樂 動

慈州 靈蓋如飛仙靈泉涌病得愈

魏州 數放光明天雨寶華人人得之 沉州

汴州 異香放光見像患差

梓州 放光五色

許州 去州九十放光明見覆塔甘井踊現

豫州 五色光現 顯州 文字金色

曹州 光變寵繁

安州 感香一夕放光雲蓋兼集

晉州 三度放光五色光明

懷州 雄菟自來駒附放光異迹

陝州 前後十一度現光靈瑞

洛州 香氣如風數放光明

鄧州 函作五文現

秦州 重得舍利函變瑪瑙

衛州 光照於外

洛州 僧先患膏不行聞迎十里得差

鄭州 放光播內向明

祀州 放光五色

右總五十三州四十州已來皆有靈瑞不可備列具存大傳

法苑珠林卷第五十三

校譌

第十二紙

十五行財南藏作材

第十九紙

十九行吼北藏作孔

音釋

韜

他刀切也

荐

才甸切屢也

髭

卽移切口上須也

宜

咨邪切也

飭

斯義

切盡也

燔

符袁切也

凹

於交切與切同

奩

力益切也

揣

楚委切也

毫

地名

膊

伯各切

曠

古限切

蜺

音顯屬

窳

烏甲切

盩

盩之切

盩屋縣名

盩

于分切

山東參政管運司事南昌廿一驥施賢刻此

法苑珠林第五十三卷

吳江比丘明覺對

眞

州王國英書

漂水毛詩賦刻

萬曆辛卯冬清涼山妙德庵識

眞

